

S'annu coladu su [Plan Ibaretxe](#), fatu pro s'autodeterminatzione de sos bascos, beniat refudau dae s'Istadu ispaniolu. Tando aviamus contadu in curtzu s'istoria basca e s'Istatutu issoro. Ocannu est tocadu a sa Catalùnya presentare unu Istatutu de autonomia novu. Brias e peleas non mancant nemmancu custa borta, ma antes de arribbare a su chi narat s'Istatutu presentadu diat deper èssere menzus chistionare, mancarì si no at a èssere in manera "esaustiva", de s'istoria de sa Catalùnya pro cumprèndere cumente e proite sos catalanos chertzant custa fromma de autodeterminatzione.

Su rennu de Catalùnya est nàschidu dae su cozuviu intre Remundu Berenguer IV e Petronila de Aragona in su 1137.

S'unidade de terrinos e governu lompèt a una realidade de deritu cun su cuntratu de Corbeil in su 1258 fatu dae Jaime I *su Conchistadore* e Luisu IX: su primu atzetavat de pèrdere sos terrinos a s'àtera banda de sos Pireneos (a parte Montpellier) e su re de Fràntzia a sos deritos supra sos terrinos catalanos chi antes tocavant a sos res carolingios. In custa manera sa Catalùnya perdiat parte de su chi teniat ma balanzavat s'indipendentzia pro deritu.

Sa Generalitat de sa Catalùnya agatat sas radighinas suas in sas Cortes Reales Catalananas chi si reuniant cun sa cramada dae parte de su re in sos tempos de Jaime I *su Conchistadore* pro rapresentare sos istamentos de tando. Sas Cortes Reales Catalananas peroe bi furint zai dae s'annu 1021 cun sas assembleas de Pau e Treva (Paghe e Pasu de sas armas) chi si reuniant po seperare ite fàghere in gherra.

Suta su rennu de Perdu II su Mannu (1276-1285) sas Cortes Reales Catalananas pigavant una fromma istituzionale e dae su 1273 cada annu si reuniant in sa General Cort cun funtziones de cunsizu e legislativas po parte de sos tres istamentos: eclesiàsticu, militare e popolare.

Su primu passu po sa nàschida de sa Generalitat peroe s'agatat in Monzón (Aragona) in su 1289 cando benit creada sa *Diputació del General*, una cumissione pro tempore pro regollire sos tributos. Su de duos passos intames agatat logu in sas Cortes de su 1358-1359 fatas in Barcelona-Villafranca-Cervera cando bi fut a su cumandu Perdu III su Tzerimoniosu e sa Castilla aviat conchistadu Aragona e Valencia e sos gastos pro sa gherra furint medas. Pro custu sas Cortes Catalananas aviant nummenadu doghi deputados chi depiant aderire a sas chistiones fiscales e unos tantos auditores de contos chi averguavant s'aministratzione suta s'autoridade de cussu chi benit cussideradu su primu Presidente de sa Generalitat: Berenguer de Cruilles, missennore de Girona (1359).

Su de tres passos sunt sas Cortes de Monzón de su 1362-1363, uve si faghet unu tributu mutidu Generalitats, chi cunsentiat intradas de dinare autonomas.

In sas Cortes de Barcelona-Lleida-Tortosa de su 1364 e 1365 sa Generalitat faghet a capitale sua a Barcelona e a logu de cumandu una domo uve oze b'at su *Palacio de la Generalitat*.

In su 1413 su re Ferdinando I mudat sa Generalitat in organismu de governu, belle ischirriadu dae sas Cortes e autonomu in su seperu de sos cumponentes, cun cumpetenzias in materias de zustissia, de dinare e politica. Unu annu antes sa Corona catalano-aragonesa andavat in manos castillana po contu de sos Trastàmara in sa pessone de su matessi Ferdinando I de Antequera.

Sas Cortes de Barcelona de su 1421 cun *Lo fruit de les lleis* (su frutu de sas lezes) davant a sa Generalitat sa possibilitade de ecuilibrare s'autoritarismu de sa monarchia. Custa funtzione si faghiat prus fortes cun sas Cortes de 1481, cunvocadas dae Ferdinando II, chi acordavant sa costituzione *Poc valria* (Pagu diat a baler). Difatis sa Poc valria navat: "*pagu diat a baler a faghene lezes chi non potant baler pro nois, su re, e sos ufitziales nostros*". In custa manera sa Generalitat teniat una balia de cuntrollu costituzionale paris cun sa Real Audiencia.

Suta su rennu de sos res Catòlicos, chi aviant aunidu sas coronas de Castilla e Catalùnya-Aragona, intravant in Catalùnya istituziones castillanas che a su tribunale de s'Inquisizione, omnes de governu e militares castillanos.

Custa fromma de dipendentzia-isolamentu in Catalùnya si faghet prus forte cun Càralu I re de sa Domo de sos Asburgo

Cun custa zenia nova de res de s'Austria naschit sa figura de visurè chi pagu de acordiu andavat cun sa Generalitat, mescamente po sa chistione de sos tributos. Una situatzione chi andavat sempere pezorande cun Filipu III e mescamente cun Filipu IV finas a arribbare a sa gherra aperta. Custu ca essende Filipu IV galu minore chie cumandavat e faghiat politica tzentralizadora fut su conte-duca de Olivares, chi cheriat ponnere totus sos rennos de Ispannia suta "*al estilo y las leyes de Castilla*". Po buscare dinare po sa Gherra de sos Trinta Annos (1618-1648) beniat ismentigada sa costituzione de Catalùnya, chi su matessi re aviat zuradu de atzetare, uve si navat chi su dare dinare e omnes pro una gherra fut unu isseberu liberu de sos catalanos e chi non podiat essere de obbligu. Sa Generalitat aviat depiu collire tando cada casta de menethas in sas pessones de su Presidente Pau Claris e de su rapresentante de su brathu militare Francesc de Tamarit chi deretu aviant impresonadu.

In prus sas trupas castillanas faghiant cada casta de ghelea in terra catalana, imbenenande su coro de cussa zente chi su fut rebellada cunsentinde gai a su conte-duca de Olivares de faghene s'invasione su 7 de lampadas de su 1640.

Su re de Frantzia, pro mediu de Richelieu, aviat promitiu azudos a sos catalanos e sa nàschida de sa republica catalana. Su 26 de ghenarzu de su 1641 in sa batalla de Montjuïc s'esertzitu de Filipu IV perdiat e si retiravat, e unu mese apustis moriat su Presidente Pau Claris.

Sa destitutzione de su conte-duca de Olivares, sas promissas de Filipu IV de respetare sas istituzziones catalanas, sa gana e sa peste aviant frimmadu sa gherra in su 1652. Cun sa paghe de sos Pireneos intre Luisu XIV e Filipu IV sa Catalùnya perdiat bona parte de sos terrinos suos chi andavant a sa Frantzia cunfirmande chi su re Filipu non respetavat sa costituzione catalana.

Cun sa morte de Filipu IV e de Càralu II chi no aviat lassadu erentzia, comintzat sa gherra de Sucessione pro su rennu de Ispannia chi batit a su cumandu de Filipu V. In su 1713 comintzavat s'assediu a Barcelona dae parte de su re chi sos catalanos bidiant cumente su peus rapresentante de s'assolutismu e su tzentralismu. In su 1714 sa Generalitat benit cantzellada cun custas allegas: "*que arrimen todas las insignias, cesen totalmente, así ellos como sus subalternos, en el ejercicio de sus cargos, empleos y oficios y entreguen las llaves, libros y todo lo demás concerniente a dicha casa de la Diputación y sus dependencias...*"

Isparèssia sa Generalitat, desarmadas sas fortzas militares, esiliados e impresonados sos ghiadores de sa resistenzia, serrada sa Casa de la Moneda, tancada sa Universidade de Barcelona, decretadu su manizu ufiziale de su castillanu in logu de sa limba catalana, sa Catalùnya aviat perdiu totu su podere.

Cun sos rennantes bennios apustis de Filipu V, Fernando VI (1746-1759) e Càralu III (1759-1788) sos catalanos chircavant de recuperare sa cultura e s'economia, cust'urtima favorida dae Càralu III chi avia cunsentidu a sos portos cumertzales catalanos de traballare in manera diretta con sos de America. Est custu su tempus de isvilupu mannu de s'industria in Catalùnya.

Sa vida politica peroe partiat galu totu dae Madrid e si sa limba in su manizu ufiziale che l'aviat modia Filipu V, Càralu III che la moviat finas dae s'imparu in sas iscolas primarias e secundarias in su 1768. Ma custu no aviat mortu sa limba catalana chi aviat campadu in operas literarias de balore mannu. Viva sa limba, viva abarravat sa cussentzia natzionale. Gasi in su 1789, cando si furint reunidas sas Cortes in Madrid pro su zuramentu de su printzipe Fernando, sa rapresentantzia de sos catalanos fut acudia a ive cumente *Diputación del Principado de Catalùnya*, belle in ammentu de sa Generalitat isparèssia.

Po belle totu su seculu XIX sa Catalùnya fut impinnada in gheras tziviles e isseberos intre Napoleone o Fernando VII. S'atzione prus sicura e crara po su recuperu de su podere politicu pèrdiu cun s'abolizione de sa Generalitat po manu de Filipu V fut sa Asemblea costitutiva da sa Unione

Catalanista in su 1892, uve si poniant sas “Bases po sa Costituzione regionale catalana” connotas cumente “Bases de Manresa”, uve si pediant sa creazione de sas Cortes Catalanas, organu cun podere esecutivu autonomu, de torrare a ponnere sa Audiencia de Catalùnya cumente organu de podere de sa justizia, s’ordine publicu e s’imparu suta unu cuntrollu autoctonu e s’uffizialidade de su catalanu cumente unica limba de sa Catalùnya.

Grassias duncas a sa revoluzione industriale e a su renaschimentu culturale, artisticu e literariu creschet fintzas su catalanismu politicu chi in su 1906 batit a sa nàschida de sa Solidaritat Catalana, unu movimentu autonomista fatu de ateros sòtzios cumente sa Lliga Regionalista, sa Unió Republicana, sa Unió Catalanista, gai cumente sos natzionalistas repubblicanos, federales, carlistas e indipendentes. Custu movimentu fut essidu a campu po si chensciare de sa repressione militare cuntras a sos organos de imprenta catalana e ponner fronte a una leze de jurisdizione de su governu tzentrale chi risultavat essere antidemocratica e antiautonomista. Difatis s’annu apustis sos candidados de Solidaritat Catalana binchiant.

De custu movimentu, sos duos òmines prus de importu furint Enric Prat de la Riba e Francesc Cambó. Su primu de custos aviat dau una giustificazione filosofica pro sa nàschida de unu Istadu catalanu in intro de una federazione ispanniola e fut fintzas s’imbentore de sa Mancomunitat de Catalùnya, chi, dae su 1914 finas a su 1925, cando fut comintzada sa ditatura de su zenerale Primo de Rivera, reuniat sos entes provintziales catalanos.

Sa derruta de custu ditatore aviat zutu sa zente a votare in sas eletziones de su 12 de aprile de su 1931 po sos movimentos repubblicanos e lassare sa monarchia, e dae sos resultados eletorales fut essia binchidore mescamente sa Esquerra Republicana de Catalùnya (ERC) ghiada dae Francesc Macià, chi duas dies apustis de sas eletziones aviat proclamadu sa República catalana in intro de sa Federazione de sos populos ibericos. Deretu in Madrid faghiant sa Segunda Republica ispanniola. Sas negossiaziones inre sos duos poderes novos de Madrid e Barcelona, su 17 de aprile, torravant a faghene nascher sa Generalitat de Catalùnya, cun Frantziscu Macià cumente primu rapresentante de s’istituzione.

Mancari si su tempus fut curtzu, chistionamus de sos annos chi andant dae su 1931 a su 1939, custu est istadu bastante po ponnere sos fundales a sa istrutura de su podere politicu in Catalùnya.

Sa responsabilidade de fagher su prozetu pro s’Istatutu de autonomia fut istau dau a s’Asemblea provisoria; una borta chi su populu l’aviat retzidu e cherthiu a maioria, fut istau presentau pro essere “ratificadu” dae sas Cortes, chi peroe aviant deretu lacanadu sas cumpetenzias lascas meda.

Su 9 de capudanni de su 1932 sas Cortes aprovavant su Istatutu de autonomia mudau e in su mese de nadale Lluís Companys ghiavat su parlamentu cumente primu Presidente catalanu cun podere esecutivu e lezislativu. Duos annos apustis beniat fatu finas su Tribunale de Cassazione. Mancari gai non si fut regollidu totu cussu chi bi fut in sa Generalitat antes de Filipu V. In su 1933 moriat Frantziscu Macià e un’annu apustis Lluís Companys, timende pro s’autonomia de sa Catalùnya, aviat briadu cun su governu tzentrale proclamande torra s’Istadu catalanu in intro de sa Republica Federale Ispanniola. S’esertzitu tzentrale aviat deretu istruncau custas ideas suspendende s’Istatutu e impresonande sos de su movimentu e solu grassias a sas eletziones zenerales de su 1936 sa Generalitat avia torrau a otènnere su chi aviat perdiu. In su matessi annu peroe, su 18 de trivulas, su zenerale Franco andavat contras a sa Republica e comintzavat sa gherra tzivile ispanniola. In Catalùnya, sa zente e sa fortza publica de sa Generalitat aviant abbrandau sa revolta de sos militares, ma custas ischintiddas aviant allutu su fogu revolutzionariu de sos anarcosindacalistas de sa CNT-FAI e solu in su maju de su 1937 Esquerra Republicana de Catalùnya pigavat torra su podere.

A s’acabu de su 1937 su governu de Madrid aviat regollidu torra su podere subra sa Catalùnya, e sas brias in intro de sa matessi Generalitat no azudavant a sicuru s’interessu de sos catalanos.

E sas brias de pagu contu, ischimus, batint a sa derruta de unu populu intreu e a sa fortuna de s’istranzu o su nemigu chi po issu si brigat : difatis su zenerale Franco in su 1938 torravat a abolire

sa Generalitat gasi e cumente aviat fatu cussu Filippu V in su 1716. Cun sa deruta de s'annu apustis su governu catalanu, sos de su parlamentu e mizas e mizas de tzitadinos furint obligados a s'esiliu. Su Presidente Lluís Companys beniat impresonadu e mortu in su 1940. Si faghiat a presidente de sa Generalitat cussu de su Parlamentu catalanu, Josep Irla, fintzas a su 1954, cando si fut dimitiu. S'apretu po fagher sighire s'istitutzione de sa presindenzia catalana aviat ispintu a s'elezione de unu Presidente novu in s'Ambassada ispanniola de su Messicu, chi bellagai no aviat reconnotu su regime de Franco, eleginde a Josep Tarradellas.

Cando in su 1975 morit Franco, benit proclamadu re Juan Carlos I chi lagalizat sos partidos politicos e sas eleziones chi si faghent su 15 de lampadas de su 1977. Comintzavat su caminu cara a sa democratzia. In Catalùnya binchiant sos partidos chi presentavant in su programma issoro de fagher torrare in vida sa Generalitat e su presidente in esiliu. Deretu apustis naschiat su prozetu de Istatutu de autonomia connotu, pro su logu uve fut istau iscritu, cumente Istatutu de Sau.

In su mese de nadale de su 1978 su re Juan Carlos I firmavat sa Costituzione ispanniola a innantis de sas Corte Generales e unu annu apustis, su 18 de nadale de su 1979, atzetavat fintzas su Istatutu de autonomia de Catalùnya zai fatu dae su populu catalanu duos meses antes.

In su preàmbulu si leghet chi cussu est sa espressione colletiva de sa Catalùnya, mutinde sas istitutzione e sas relatziones suas cun s'Istadu cumente una lacana de solidariedade libera cun sas ateras natzionalidades e regiones, e chi sa Generalitat resultat essere sa istitutzione uve s'organizat politicamente s'autogovernu de sa Catalùnya.

Atera die de importu est sa de su 20 marthu 1980 cun sas de duas eleziones lezislativas apustis de barantoto annos dae sas primas. E su 10 de abriale de su matessi annu sos diputados eligent a Heribert Barrera cumente Presidente de su Parlamentu e a Jordi Pujol, de su partidu cunservadore Convergencia i Uniò, cumente Presidente de sa Generalitat istorica.

Podimus nàrrere chi Jordi Pujol est istadu su babu de sa Catalùnya moderna essende istadu Presidente de sa Generalitat dae su 1980 a su 2003, confirmadu in su 1984, 1988, 1992, 1995 e 1999. Apustis de custu rennu longu e de afortiamentu catalanu, ammentamus sa Leze pro sa Normalizatzione Limbistica pro fàghere intrare sa limba in sos medios de massa, binchet sas eleziones s'oposizione cun sa pessone de Pasqual Maragall. Dae custas eleziones peroe essit a foras chi Maragall e su partidu suo, su PSC, Partidu de sos Sotzialistas de Catalùnya, mancari si at retzidu prus votos tenet prus pagos seggios de CiU, e duncas li tocat a si sortire pro fàghere su governu cun sos partidos ERC, Esquerra Republicana de Catalùnya, e sa coalitzione rubiu-virde ICV-EuiA, Iniciativa per Catalunya Verds - Esquerra Unida i Alternativa.

Cun su slogan "*tempos novos, Istatutu novu*", su 30 de capudanni de su 2005 cun sos votos de sos partidos CiU, PSC, ERC e ICV-EuiA su Parlamentu catalanu aprovat su Istatutu novu chi benit mandau a sas Cortes e a sa Comissione Costitutzionale de su Cungressu de sos Diputados chi lu averguat articulu po articulu.

Mescamente duas cosas no agradant a s'Istadu ispanniolu: s'allega Naciòn e su modellu de finantziamentu novu. Custos sunt puntos fortes in d-una chistiona de autodeterminatzione, su primu ca tocat s'ideologia cumone e s'ateru sos tributos.

S'allega naciòn no agradat ca est tropu forte e "periculosa" mancari si in manera ufiziale est ca diat a andare contras a s'articulu 2 de sa costituzione ispanniola, uve resultat chi est s'Ispànnia e bastu una nazione. (si sos valentanos faghent su Istatutu novu non diant a deper pònnere s'allega "Rennu" ca rennu ch'est zai s'Ispànnia). Pro la nàrrere totu, s'Istadu ispanniolu reconnoschet chi sos catalanos si reconnoscant in d-una nazione ma non reconnoschet sa nazione! Como si cheret arribare a unu puntu de atòbiu lassande s'allega naciòn in su preàmbulu de s'Istatutu e s'allega nacionalidad in sos articulos, mancari si ERC est cuntrària.

Su sistema de finantziamentu, cun sa creazione de una bilateralidade intre Generalitat e Istadu ispaniolu, cun sa creazione de una Agentzia Tributaria Catalana, diat a pònnere sa Catalùnya in autonomia fiscale cunfrontàndesi cun s'Istadu cumente unu Ente foras de issu, e su dinare de sas tassas catalanas diant depere abbarrare in Catalunya.

Est pro cust chi su Istadu est cuntratande pro ammoddigare s'Istatutu, ca èssere tropu lascos diat a chèrrere nàrrere un'àtera die indipendentzia dae s'Ispànnia. CiU est cuntratande, ma ERC no tzedet e narat chi su Istatutu diat dèpere abbarrare cussu chi su Parlamentu catalanu at isseberadu, ca sinono si torrat a fàghere s'isbàlliu de su 1979, cando pro sa presse e sa timoria s'est atzetadu unu Istatutu chi non teniat fortza e chi sinono mai prus s'at a balanzare cussu podere chi sa Generalitat teniat antes de Filipu V.

Amus a biere uve at a andare a parare sa chistione.

7/02/2006

Micheli Ladu